

Bičakčić i Branković oslobođeni optužbe

Kantonalni sud u Sarajevu oslobodio je danas Edhema Bičakčića i Nedžada Brankovića, bivše premijere Vlade Federacije Bosne i Hercegovine (FBiH), optužbe da su zloupotrijebili službeni položaj ili ovlasti u slučaju kupovine stana u Sarajevu

Obrazlažući presudu sudija Dalida Burzić je rekla da je tužitelj optužnicu zasnovao na dokumentu koji nije bio niti originalan niti ovjeren, što Sud nije mogao prihvatiti kao dokaz. Vještačene obavljeno na osnovu tog dokumenta za Sud također nije bilo prihvatljivo, a prilikom donošenja presude uzeta je u obzir i činjenica da u toku postupka ni Vlada FBiH ni Energoinvest nisu postavili imovinsko pravni zahtjev.

Kantonalno tužiteljstvo u Sarajevu je protiv Brankovića i Bičakčića podiglo optužnicu u aprilu 2009. godine. Prema navodima optužnice Bičakčić je potpisao Odluku o rasporedu sredstava iz proračuna u 2000. godini za rješavanje stambenog pitanja djelatnika zakonodavne, izvršne i sudske vlasti BiH i FBiH, iako 'mu je bila poznata činjenica da Vlada FBiH nikada nije ni razmatrala, niti je donijela navedenu Odluku.'

Na osnovu ove Odluke njih dvojica su 22. maja 2000. godine zaključili Sporazum o udruživanju sredstava između Vlade FBiH i Energoinvesta, koga je Branković zastupao kao direktor. Sporazumom su određena sredstava za kupovinu stana u sarajevskom naselju Ciglane, u vlasništvu Nade Ludvig Pećar, koji je procijenjen na iznos od 150.000 KM.

Taj stan je Branković ranije kao zainteresirani građanin pogledao, a poslije savjetovao Pećarevu da ga ponudi na prodaju Vladi FBiH, što je ona i učinila. Istoga dana kada je zaključen sporazum Vlada FBiH je potpisala kupoprodajni ugovor sa Pećarevom na sumu od 264.000 KM. Energoinvest je uplatio

150.000 KM, a ostatak novca je namirila Vlada FBiH. Branković je stan otkupio certifikatima koji su tada vrijedili 900 KM.

Optužnicu protiv Brankovića i Bičakčića podnio je tadašnji kantonalni tužitelj Oleg Čavka, a njegovim imenovanjem u državno Tužilaštva slučaj je preuzeo tužitelj Džemal Karić. U ranijem razgovoru za CIN, tužitelj Čavka je rekao kako je optužnica nastala na osnovu članka CIN-a objavljenog u aprilu 2009. godine.